



Adroddiad Arolygu

Meithrinfa Plas Pawb

**Canolfan Integredig Plas Pawb
Safle Ysgol Maesincla
Maesincla
Caernarfon
LL55 1DF**

This report is also available in English

Mae'r adroddiad hwn hefyd ar gael yn Saesneg



Dyddiad Cwblhau'r Arolygiad

12/10/2023

Meithrinfa Plas Pawb

Y math o ofal a ddarperir	Gofal Dydd Plant Gofal Dydd Llawn
Darparwr Cofrestredig	Gwasanaethau Gofal Plant a Chwarae Cyngor Gwynedd
Lleoedd cofrestredig	52
Iaith y gwasanaeth	Cymraeg
Arolygiad blaenorol Arolygiaeth Gofal Cymru	20 Mawrth 2018
A yw hwn yn wasanaeth Dechrau'n Deg?	Ydy
Ydy'r gwasanaeth hwn yn hyrwyddo'r iaith Gymraeg a diwylliant Cymru?	Mae'r gwasanaeth yn darparu 'Cynnig Rhagweithiol' ar gyfer y Gymraeg. Mae'n darparu gwasanaeth sy'n rhagweld, yn nodi ac yn diwallu anghenion Cymraeg a diwylliannol pobl sy'n defnyddio'r gwasanaeth, neu a all ei ddefnyddio.

Llywodraeth Cymru © Hawlfraint y Goron 2023.

Cewch ddefnyddio ac aildefnyddio'r wybodaeth sydd yn y cyhoeddiad hwn (ac eithrio'r logos) yn ddi-dâl, mewn unrhyw fformat neu gyfrwng, o dan delerau'r Drwydded Llywodraeth Agored. Gallwch weld y Drwydded Llywodraeth Agored ar wefan yr Archifau Gwladol, neu gallwch ysgrifennu at The Information Policy Team, The National Archives, Kew, London, TW9 4DU, neu anfon e-bost i: psi@nationalarchives.gsi.gov.uk

Rhaid i chi atgynhyrchu ein deunydd yn fanwl gywir a pheidio â'i ddefnyddio mewn cyd-destun camarweiniol.

<u>Llesiant</u>	Da
<u>Gofal a Datblygiad</u>	Da
<u>Yr Amgylchedd</u>	Da
<u>Arweinyddiaeth a Rheolaeth</u>	Da

I gael rhagor o wybodaeth am raddau, gweler diwedd yr adroddiad hwn

Crynodeb

Mae'r plant yn hapus, wedi setlo ac yn gwneud dewisiadau o ran sut i dreulio eu hamser. Maent yn teimlo'n ddiogel ac yn hyderus yn y lleoliad gan eu bod wedi datblygu cydberthnasau cadarnhaol â'r staff ac yn gwneud ffrindiau â'i gilydd. Mae'r plant yn mwynhau'r gweithgareddau sydd ar gael iddynt, ac maent yn canolbwyntio'n dda ar dasgau.

Mae'r staff yn deall eu cyfrifoldebau o ran cadw'r plant yn ddiogel ac yn iach. Maent yn adnabod y plant yn dda ac yn siarad â nhw mewn ffordd gynnes a chyfeillgar. Mae'r staff yn rheoli'r rhyngweithio mewn ffordd gadarnhaol ac yn annog moesau da. Maent yn cynllunio amrywiaeth o brofiadau chwarae ysgogol i'r plant, sy'n eu helpu i ddatblygu sgiliau cymdeithasol da.

Mae'r bobl sy'n rhedeg y lleoliad yn sicrhau bod pob ardal a ddefnyddir gan y plant yn ddiogel ac yn groesawgar. Mae'r teganau a'r adnoddau o ansawdd da ac yn cynnig digon o gyfleoedd i'r plant ddysgu a meithrin eu sgiliau. Mae'r bobl sy'n rhedeg y lleoliad yn sicrhau bod y plant yn cael digon o gyfleoedd i ddysgu am y byd o'u cwmpas drwy ddarparu cyfoeth o ddeunyddiau naturiol ac wedi'u hailgylchu a gwrthrychau bywyd go iawn.

Mae'r bobl sy'n rhedeg y lleoliad yn rheoli'r gwasanaeth yn effeithiol. Maent yn sicrhau bod y staff yn cael hyfforddiant priodol i gefnogi plant a'u hanghenion unigol. Fodd bynnag, mae angen iddynt sicrhau y caiff yr holl wybodaeth angenrheidiol ei chasglu wrth recriwtio aelodau newydd o staff. Mae'r bobl sy'n rhedeg y lleoliad yn ymdrechu i ddarparu gwasanaeth o ansawdd uchel i'r plant a'u teuluoedd.

Mae'r plant yn hapus ac wedi setlo ac maent yn mwynhau treulio amser yn y lleoliad. Maent wedi ffurfio cydberthnasau agos â'r staff ac yn teimlo'n hyderus i fynd atynt am fwythau a thawelwch meddwl pan fydd eu hangen arnynt, gan wybod y bydd y rhain yn cael eu rhoi'n ddi-oed, heb gwestiwn. Mae'r plant yn symud yn rhydd o amgylch yr ardaloedd chwarae a'r gweithgareddau sydd ar gael ac yn arwain a chyfarwyddo eu chwarae eu hunain drwy gydol y dydd. Caiff dewisiadau unigol y plant eu parchu drwy gydol eu hamser yn y lleoliad. Er enghraifft, gall y plant gysgu pryd bynnag y byddant wedi blino ac nid ar amseroedd cysgu penodedig a chynigir gweithgareddau gan ystyried eu hoff bethau a'u cas bethau.

Mae'r plant yn amlwg yn teimlo'n ddiogel yn eu hamgylchedd. Maent yn hyderus i fynd at ymwelwyr i drafod yr hyn maent yn ei wneud. Maent yn hyderus i fynegi eu dymuniadau a'u hanghenion i'r staff ac yn gwybod y bydd eu dymuniadau'n cael eu parchu. Er enghraifft, pan nododd un plentyn fod yn well ganddo iogwrt na'r pwddin a oedd yn cael ei gynnig, aeth y staff ati'n gyflym i ddarparu iogwrt yn lle'r pwddin. Mae bron pob un o'r plant yn awyddus i rannu eu cyflawniadau ac i gynnwys y staff yn eu chwarae gan eu bod yn gwybod y byddant yn ymateb yn frwdfrydig. Er enghraifft, galwodd y plant ar y staff er mwyn dangos y pryf genwair roeddent wedi'i ganfod yn y mwd a gwnaeth y staff ymateb yn frwdfrydig. Aethant ati wedyn i chwilio am fwy o bryfed gyda'i gilydd, gan sgwrsio'n hapus wrth wneud hynny.

Mae bron pob un o'r plant yn rhyngweithio'n dda â'i gilydd ac maent yn dechrau gwneud ffrindiau gyda'r plant eraill. Er enghraifft, gweithiodd y plant gyda'i gilydd i greu pont i'r ceir chwarae gan ddefnyddio riliau cardbord mawr a darnau o bren. Roeddent yn sgwrsio'n fywiog ac yn rhoi cyfarwyddyd i'w gilydd wrth chwarae, gan adeiladu dwy bont yn y pen draw er mwyn i bawb gael lle i wthio eu ceir drostynt. Mae'r rhan fwyaf o'r plant iau yn cydweithredu'n dda â'i gilydd wrth chwarae ac yn ymateb yn gadarnhaol i gyfarwyddyd y staff. Er enghraifft, wrth chwarae yn yr ardal awyr agored, roedd y babanod yn hapus i aros eu tro i ddefnyddio'r llithren gydag ambell i sylw gan y staff.

Mae bron pob un o'r plant yn awyddus iawn i archwilio eu hamgylchedd ac maent yn mwynhau cymryd rhan yn y gweithgareddau sydd ar gael. Er enghraifft, gwnaeth grŵp o blant fwynhau cymryd eu tro i gerdded ar hyd trawst cydbwysu a grëwyd ganddynt, gan alw i ddangos i'w gilydd pan oeddent wedi cyrraedd y diwedd. Roedd grŵp arall o blant yn mwynhau chwarae yn yr hambwrdd dŵr, gan sgwrsio â'i gilydd wrth iddynt lenwi eu caniau dyfrio a'u cario yn ôl ac ymlaen i lenwi'r twba. Gellid clywed llawer o chwerthin, bloeddio a sgwrsio hapus yn ystod y gweithgareddau hyn wrth i'r plant ddangos yn gyffrous i'r staff a'u ffrindiau beth roeddent yn ei wneud.

Caiff pob plentyn ei annog a'i gefnogi i wneud pethau drosto'i hun. Mae'r plant hŷn yn cwblhau tasgau hunanofal yn annibynnol, ac yn cael cymorth os bydd ei angen. Gall y babanod ymarfer bwydo eu hunain yn ystod amser cinio a byrbryd, a rhoddir digon o amser a lle iddynt wneud hynny'n annibynnol. Mae pob un o'r plant yn arwain ac yn cyfarwyddo eu chwarae ac yn dewis adnoddau fel y dymunant, gan fod y teganau a'r gweithgareddau

wedi'u gosod mewn ffordd sy'n galluogi'r plant i gael gafael arnynt yn hawdd ac yn annibynnol.

Mae'r staff yn hyderus o ran eu dyletswyddau i ddiogelu plant; mae pob un ohonynt wedi cael hyfforddiant ar ddiogelu plant. Roedd y staff y gwnaethom siarad â nhw yn hyderus iawn o ran y camau cywir i'w dilyn pe byddai ganddynt bryder am blentyn. Mae'r staff yn sicrhau bod y plant yn gwybod sut i adael yr adeilad yn gyflym ac yn ddiogel pe byddai angen gwneud hynny, drwy gynnal ymarferion tân rheolaidd. Mae'r ymarferion hyn wedi'u dogfennu'n dda mewn cofnodlyfr penodol. Mae gan gyfran dda o'r staff dystysgrifau cymorth cyntaf pediatrig cyfredol a chaiff unrhyw ddamweiniau neu ddigwyddiadau eu cofnodi'n effeithiol a'u rhannu â'r rhieni.

Mae'r staff yn annog ffyrdd iach o fyw drwy ddarparu digon o gyfleoedd i'r plant wneud ymarfer corff a threulio amser allan yn yr awyr iach. Caiff hylendid da ei hyrwyddo, gyda'r staff yn annog ac yn cefnogi pob plentyn i olchi ei ddwylo yn ôl yr angen. Mae amrywiaeth eang o brydau a byrbrydau iach ar gael i'r plant. Mae systemau effeithlon ar waith i sicrhau bod y staff yn ymwybodol o ofynion deietegol unigol y plant er mwyn iddynt allu sicrhau bod y plant yn cael prydau a byrbrydau addas.

Mae'r staff yn siarad mewn ffordd gynnes a charedig â'r plant. Maent yn rhoi cysur a thawelwch meddwl pan fydd eu hangen ar y plant ac yn eu trin â pharch. Maent yn annog rhyngweithio cadarnhaol gan ddefnyddio strategaethau cadarnhaol ac effeithiol iawn, gan roi cyfarwyddiadau clir wrth esbonio i'r plant pan nad oedd eu hymddygiad yn briodol. Er enghraifft, pan wnaeth y plant orgynhyrfu a dechrau rhedeg o gwmpas yn yr ardal dan do, nododd y staff yn glir y dylent gerdded yn yr ystafell chwarae rhag ofn y byddai rhywun yn brifo, cyn gofyn yn garedig iddynt fynd i chwarae yn yr awyr agored os oeddent am redeg. Arafodd y plentyn yn gyflym a cherddodd yn bwyllog i ôl y tegan yr oedd ei eisiau. Roedd y staff yn dangos esiampol o sut i ryngweithio'n gadarnhaol drwy gydol y dydd, gan roi digon o ganmoliaeth i'r plant am ymddygiad da, am gwblhau gweithgareddau ac am roi cynnig ar bethau newydd.

Mae'r staff yn adnabod y plant yn dda ac yn gallu ymateb yn effeithiol i'w hanghenion unigol. Gofynnir am fanylion cynhwysfawr am ddewisiadau ac anghenion unigol y plant cyn iddynt ddechrau a defnyddir y wybodaeth hon i gynllunio amrywiaeth o weithgareddau a phrofiadau ysgogol i'r plant. Mae'r staff hefyd yn cynnal arsylwadau rheolaidd ar y plant a chedwir gwybodaeth yn deillio o'r arsylwadau hyn yng nghofnodion dysgu unigol y plant. Mae gan y staff systemau effeithiol ar waith i gyfathrebu â'r rhieni, gan eu hysbysu'n rheolaidd am amser eu plentyn yn y lleoliad.

Mae'r bobl sy'n rhedeg y lleoliad yn blaenoriaethu diogelwch y plant ac yn sicrhau bod y staff yn dilyn gweithdrefnau yn effeithiol i ddiogelu'r plant. Er enghraifft, mae'r staff yn gofyn i ymwelwyr lofnodi'r llyfr ymwelwyr wrth gyrraedd ac maent yn sicrhau bod y safle, gan gynnwys yr ardaloedd awyr agored yn ddiogel. Mae hyn yn atal unrhyw fynediad heb awdurdod i'r safle. Mae'r staff yn cadw cofrestr gywir o bresenoldeb y plant. Fodd bynnag, ni chaiff yr amseroedd cyrraedd a gadael eu nodi. Mae gan y bobl sy'n rhedeg y lleoliad asesiadau risg ysgrifenedig cynhwysfawr ar waith. Mae'r rhain yn amlinellu unrhyw risgiau posibl i ddiogelwch y plant a'r camau a gymerwyd i reoli neu ddileu'r risgiau hyn. Caiff y rhain eu hadolygu'n rheolaidd a chaiff unrhyw gamau gweithredu gofynnol eu cwblhau'n brydlon, gan sicrhau y caiff yr holl beryglon posibl eu monitro a'u rheoli'n effeithiol.

Mae'r bobl sy'n rhedeg y lleoliad yn sicrhau bod pob ardal a ddefnyddir gan y plant yn cynnwys digon o le, yn cael ei chynnal a'i chadw'n dda ac yn groesawgar. Mae pob ystafell chwarae wedi'i threfnu'n dda a'i haddurno'n ddeniadol mewn lliwiau niwtral a chan ddefnyddio deunyddiau naturiol lle y bo'n bosibl. Er enghraifft, mae pwyslais ar ddefnyddio teganau pren, deunyddiau naturiol ar gyfer adeiladu, gwrthrychau go iawn yn yr ardaloedd chwarae rôl a basgedi o wiail i storio teganau. Mae'r teganau a'r adnoddau yn cael eu cadw'n drefnus mewn blychau a chânt eu storio ar lefel isel fel y gall y plant ddewis ohonynt yn annibynnol. Mae'r ardal chwarae awyr agored yn darparu ystod eang o gyfleoedd i'r plant archwilio a chwarae er mwyn datblygu eu dychymyg a'u dealltwriaeth o'r byd o'u cwmpas. Er enghraifft, ardaloedd chwarae gyda dŵr, cyfarpar dringo, darnau rhydd, gwestai pryfed a cheginau mwd.

Mae'r bobl sy'n rhedeg y lleoliad yn darparu amrywiaeth dda o deganau ac adnoddau sydd mewn cyflwr da ac sy'n briodol ar gyfer oedrannau a chamau datblygu'r plant. Caiff yr adnoddau eu cynnal a'u cadw'n dda a'u glanhau'n rheolaidd. Fodd bynnag, nid yw'r staff bob amser yn cofnodi pryd y caiff teganau ac adnoddau eu glanhau. Mae'r celfi a'r adnoddau ym mhob ystafell chwarae wedi cael ystyriaeth ofalus ac o faint addas ar gyfer oedrannau'r plant a fydd yn eu defnyddio. Mae'r toiledau yn cynnwys cyfleusterau addas, gyda sinciau a thoiledau isel i hyrwyddo annibyniaeth y plant.

Mae'r bobl sy'n rhedeg y lleoliad yn rhannu gweledigaeth glir ar gyfer y lleoliad â'r staff ac mae ganddynt amrywiaeth dda o bolisiâu a gweithdrefnau ar waith, sy'n cyfrannu'n effeithiol at redeg y lleoliad yn hwylus. Maent yn adolygu'r polisiâu hyn yn rheolaidd, gan sicrhau eu bod yn gyfredol a'u bod yn cynnwys yr holl wybodaeth angenrheidiol. Mae'r bobl sy'n rhedeg y lleoliad yn sicrhau bod y datganiad o ddiben yn rhoi disgrifiad clir a chywir o'r gwasanaeth a gynigir. Mae hyn yn golygu y gall rhieni wneud penderfyniad gwybodus o ran p'un a yw'r lleoliad yn diwallu eu hanghenion nhw a'u plentyn ai peidio.

Mae gan y bobl sy'n rhedeg y lleoliad drefniadau cadarn i nodi cryfderau a meysydd i'w gwella. Maent yn gofyn yn rheolaidd am adborth ar lafar gan y rhieni yn ogystal â thrwy anfon holiaduron adborth at y rhieni a'r staff. Caiff adborth ei gasglu hefyd gan y plant drwy siarad â nhw ac arsylwi arnynt yn ddyddiol. Wedyn, bydd y bobl sy'n rhedeg y lleoliad yn llunio adroddiad mewn ymateb i'r adborth a gafwyd, gan nodi unrhyw welliannau a wnaed hyd yma a'r rhai sydd wedi'u cynllunio ar gyfer y dyfodol.

Mae'r bobl sy'n rhedeg y lleoliad yn sicrhau bod y staff yn cael hyfforddiant a chymorth rheolaidd i gyflawni eu rolau yn effeithiol. Mae ffeiliau'r staff yn gynhwysfawr ac mae'r rhan fwyaf yn cynnwys yr holl wybodaeth ofynnol, gan ddangos bod gwiriadau recriwtio diogel ar waith. Fodd bynnag, er bod angen dau eirida, dim ond un geirida oedd yn ffeil un aelod o'r staff. Nodwyd bod hyn yn faes i'w wella. Dywedodd y staff wrthym eu bod yn gallu mynd at y bobl sy'n gyfrifol am redeg y lleoliad ar unrhyw adeg i drafod unrhyw broblemau neu anghenion hyfforddiant. Caiff cofnodion o'r cyfarfodydd goruchwyllo a'r gwerthusiadau blynyddol eu cadw yn ffeiliau unigol y staff. Mae'r bobl sy'n rhedeg y lleoliad yn sicrhau eu bod bob amser yn bodloni'r gofynion o ran y nifer gofynnol o staff â chymwysterau addas i ofalu'n ddiogel am y plant.

Mae'r bobl sy'n rhedeg y lleoliad yn rhannu gwybodaeth â'r rhieni'n effeithiol. Maent yn cadw tystiolaeth mewn ffeiliau o'r wybodaeth sy'n cael ei choladu gan y rhieni am anghenion penodol eu plant, ynghyd â'u hoff bethau a'u cas bethau. Maent yn anfon taflenni gwybodaeth i'r rhieni bob dydd sy'n cynnwys gwybodaeth am fwyd, amseroedd cysgu a chewynnau, yn ogystal ag unrhyw weithgareddau y mae'r plant wedi cymryd rhan ynddynt. Mae'r holiaduron adborth gan y rhieni yn canmol y lleoliad a'r gofal y mae eu plant yn ei gael.

Crynodeb o'r Achos o Ddiffyg Cydymffurfio

Statws	Ystyr pob un
Newydd	Nodwyd yr achos hwn o ddiffyg cydymffurfio yn yr arolygiad hwn.
Adolygwyd	Adolygwyd cydymffurfiaeth yn ystod yr arolygiad hwn ond ni lwyddwyd i'w chyflawni. Mae'r dyddiad targed ar gyfer cydymffurfio yn y dyfodol a chaiff ei brofi yn ystod yr arolygiad nesaf.
Heb Gyflawni	Profwyd cydymffurfiaeth yn ystod yr arolygiad hwn ond ni lwyddwyd i'w chyflawni.
Cyflawnwyd	Profwyd cydymffurfiaeth yn ystod yr arolygiad hwn a llwyddwyd i'w chyflawni.

Rydym yn ymateb i achosion o ddiffyg cydymffurfio â rheoliadau pan gaiff canlyniadau gwael i bobl, a/neu risg i lesiant pobl eu nodi drwy gyhoeddi Hysbysiad(au) Gweithredu â Blaenoriaeth.

Rhaid i'r darparwr gymryd camau ar unwaith i ymdrin â hyn a gwneud gwelliannau. Os bydd darparwyr yn methu â chymryd camau gweithredu â blaenoriaeth erbyn y dyddiad targed, gallwn uwchgyfeirio'r mater at Banel Gwella a Gorfodi.

Hysbysiad(au) Gweithredu â Blaenoriaeth

Rheoliad	Crynodeb	Statws
Dd/G	Ni nodwyd unrhyw achosion o ddiffyg cydymffurfio o'r math hwn yn yr arolygiad hwn	Dd/G

Lle byddwn yn canfod achosion o ddiffyg cydymffurfio â rheoliadau ond na chaiff unrhyw risg uniongyrchol na sylweddol i'r bobl sy'n defnyddio'r gwasanaeth ei nodi, byddwn yn tynnu sylw atynt fel Meysydd i'w Gwella.

Byddwn yn disgwyl i'r darparwr gymryd camau i unioni'r achos a byddwn yn ei ystyried eto yn yr arolygiad nesaf. Lle bydd y darparwr wedi methu â gwneud y gwelliannau angenrheidiol, byddwn yn uwchgyfeirio'r mater drwy gyhoeddi Hysbysiad Gweithredu â Blaenoriaeth.

Maes i'w Wella/Meysydd i'w Gwella		
Rheoliad	Crynodeb	Statws
28	Rhaid i'r bobl sy'n rhedeg y lleoliad sicrhau y caiff yr holl wybodaeth ofynnol ei chynnwys yn ffeiliau pob aelod o'r staff, gan gynnwys dau eirda a thystiolaeth o gymwysterau'r staff.	Newydd

Lle byddwn yn canfod nad yw'r darparwr yn cyrraedd y Safonau Gofynnol Cenedlaethol ar gyfer Gofal Plant Rheoleiddiedig ond nad oes unrhyw risg uniongyrchol na sylweddol i'r bobl sy'n defnyddio'r gwasanaeth, rydym yn tynnu sylw at yr enghreifftiau hyn fel Argymhellion i Gyrraedd y Safonau Gofynnol Cenedlaethol.

Rydym yn disgwyl i'r darparwr weithredu i ymdrin â'r rhain, a byddwn yn eu hystyried yn yr arolygiad nesaf.

Safonau Gofynnol Cenedlaethol	
Safon	Argymhelliad/argymhellion
	Ni nodwyd unrhyw argymhellion mewn perthynas â'r Safonau Gofynnol Cenedlaethol yn ystod yr arolygiad hwn

Pan fyddwn o'r farn y byddai hynny'n ddefnyddiol, mae'n bosibl y byddwn yn gwneud argymhellion arferion gorau. Nod yr argymhellion hyn yw annog lleoliadau sy'n gwneud yn dda i ddod hyd yn oed yn well wrth helpu plant i ffynnu.

Arferion Gorau	
Argymhelliad/argymhellion	
Cofnodi amseroedd cyrraedd a gadael y plant ar y cofrestrau dyddiol.	
Cadw cofnod cywir o ran pryd y caiff y teganau a'r adnoddau eu glanhau.	

Graddau	Ystyr y graddau
Rhagorol	Gwasanaethau sy'n ymrwymedig i welliant parhaus ac sydd â llawer o gryfderau, gan gynnwys enghreifftiau arwyddocaol o ymarfer ac arloesi sy'n arwain y sector. Mae'r gwasanaethau hyn yn darparu gofal a chymorth o ansawdd uchel a gallant ddangos eu bod yn gwneud cyfraniad cadarn tuag at wella llesiant plant.
Da	Gwasanaethau sydd â chryfderau a heb unrhyw feysydd pwysig sydd angen eu gwella'n sylweddol. Maent yn rhagori ar y gofynion sylfaenol yn gyson, gan sicrhau canlyniadau cadarnhaol i blant a hybu eu llesiant yn rhagweithiol.
Digonol	Gwasanaethau lle mae mwy o gryfderau na meysydd i'w gwella. Maent yn ddiogel ac yn bodloni'r gofynion sylfaenol ond mae angen gwelliannau er mwyn hyrwyddo llesiant a gwella canlyniadau i blant.
Gwael	Gwasanaethau lle mae mwy o feysydd pwysig i'w gwella na chryfderau ac mae enghreifftiau arwyddocaol o ddiffyg cydymffurfio sy'n effeithio'n negyddol ar lesiant plant. Lle bydd gwasanaethau yn wael, byddwn yn cymryd camau gorfodi ac yn cyhoeddi hysbysiad diffyg cydymffurfio.

A oedd yr adroddiad hwn yn ddefnyddiol?

Rydym am glywed eich barn a'ch profiadau o ddarllen ein hadroddiadau arolygu. Bydd hyn yn ein helpu i ddeall a yw ein hadroddiadau yn rhoi gwybodaeth glir a gwerthfawr i chi.

I rannu eich barn ar ein hadroddiadau, dilynwch y ddolen isod i gwblhau arolwg byr:

- [Arolwg adroddiadau arolygu](#)

Os hoffech roi adborth cyffredinol ar wasanaeth, ewch i'n [tudalen Arolygon adborth](#).

Dyddiad Cyhoeddi 23/01/2024